

CCCXLII.

Lettre du Prince d'Orange à Josse Borluut. — Précautions stratégiques à prendre. — Nouvelles du Duc d'Anjou. (Mss. B.)

Monsieur de Boucle ,

Je vous envoie les lettres que vous mavez demandees par deux lettres. Je n'eusse fait faulte de les envoyer plus tost n'eust esté que ie veioie l'ennemy encores trop prest de Ninove pour en tirer quelques soldats, vous en pourrez advertir Monsieur le Prince d'Espinoy. Le Colonel Souhai m'a dict vous avoir adverti que l'ennemy pourroit donner sur Menin, pourtant il sera bon de les advertir affin qu'ils se tiennent sur leurs gardes. Quant au fait de Mighem ie pense que vous et Messieurs de Gand en ferez comme la iustice et vostre honneur vous le comandent, mais ie n'ai point entendu qu'il aie receu en ceste ville aucune sentence d'absolution (1). Je pense que vous aurez entendu les bonnes nouvelles que nous avons eu de la France qui sont que Monseigneur d'Aniou tient la paix pour faicte, et se delibere de marcher incontinent en personne, a quoy sera de besoing d'aider aussy de nostre part. Je feray tout debvoir en Hollande. Je vous prie de tenir tousiours la bonne main a ce que toutes choses soient bien conduictes en Flandre, et nomement a Gand. Sur ce je prieray Dieu vous donner,

Monsieur de Boucle, avecq bonne santé heureuse vie et longue.
D'Anvers ce xxiiii^e d'Octobre 1580.

Vostre bien bon amy a vostre comandement.

GUILLE DE NASSAU.

A Monsieur
de Boucle premier Eschevin de la
ville de Gand.

(1) Voyez la note t. I, p. 48. La punition n'eut lieu qu'en 1581 comme cette note l'indique.